

I - ARABAKO BILTZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

ARABAKO BILTZAR NAGUSIAK

27/2014 Foru Araua, Uztailaren 9koa, Berotegi-Efektuko Gas Fluordunen gaineko Zergari buruzkoa

Arabako Biltzar Nagusiek 2014ko uztailaren 9an egindako osoko bilkuran ondoko foru araua onetsi dute:

27/2014 Foru Araua, Uztailaren 9koa, Berotegi-Efektuko Gas Fluordunen gaineko Zergari buruzkoa.

ZIOEN AZALPENA

Ingurumen-fiskalitatearen arloan zenbait neurri ezarri eta beste tributu- eta finantza-neurri batzuk onartzen dituen urriaren 29ko 16/2013 Legeak, 2014ko urtarrilaren 1etik aurrera, zerga-antolamenduan Berotegi-efektuko Gas Fluordunen gaineko Zerga txertatzen du. Gas horien kontsumoan eragiten duen zeharkako zerga bat da, eta fase bakarrean kargatzen du produktu horien kontsumoa, atmosfera berotzeko duten potentzialaren arabera.

Ekonomia Itunaren Batzorde Mistoak Ekonomia Ituna aldatzea erabaki du, besteak beste Berotegi-efektuko Gas Fluordunen gaineko Zerga ituntzeko.

Itun hori Arabako Biltzar Nagusiek berretsi dute, Ekonomia Itunaren Batzorde Mistoaren lehenengo erabakia berresteko otsailaren 26ko 4/2014 Foru Arauaren bidez.

Ekonomia Itunaren 34. artikulua arabera, Berotegi-efektuko Gas Fluordunen gaineko Zerga itundutako tributua da, eta Estatuak une bakoitzean ezarrita dituen funtsezko eta formazko arauak erabiliko dira hura eraentzeko.

Horregatik Foru Arau hau eman behar da, Arabako Lurralde Historikoaren zerga antolamenduan zerga hau txertatzeko eta hala Arabako zerga sistema ingurumen arloan harmonizatuzko, Europar Batasunaren bide beretik.

1. artikulua. Izaera

Berotegi-efektuko gas fluordunen gaineko zerga bere eremu objektiboan sartzen diren produktuen kontsumoan eragiten duen zeharkako zerga bat da, eta fase bakarrean kargatzen du produktu horien kontsumoa, atmosfera berotzeko duten potentzialaren arabera.

2. artikulua. Esparru objektiboa

Zerga honen ondorioetarako, "berotegi-efektuko gas fluordunak" hauek dira: berotegi-efektuko gas fluordun batzuei buruzko Europako Parlamentuaren eta Kontseiluaren 2006ko maiatzaren 17ko 842/2006 (EE) Erregelamenduko I. eranskinean jasotzen diren hidrofluorokarburoak (HFC), perfluorokarburoak (PFC) eta sufre hexafluoruroa (SF6); substantzia horiek dituzten prestakinak, birsortzaileak eta birziklatuak, ozono-geruza ezabatzen duten substantziei buruzko Europako Parlamentuaren eta Kontseiluaren 2009ko irailaren 16ko 1005/2009 (EE) Erregelamenduaren arabera araututako substantzien kasuan salbu.

3. artikulua. Araudi aplikagarria

1. Ekonomia Itunaren 34. artikuluan xedatutakoaren ildotik, zerga foru arau honetan eta hura garatzen duten xedapenetan xedatutakoarekin bat etorritik eskatuko da.

2. Foru arau honetan ezarritakoak ez du ezertan eragotziko Espainiako barne antolamendua-ren osagai bihurtu diren nazioarteko itunetan eta hitzarmenetan xedatutakoa.

4. artikulua. Zergaren ordainarazpena

Zergaren ordainarazpena Arabako Foru Aldundiari egokituko zaio, hurrengo artikulua azaltzen diren azken kontsumitzaileek zergaren xede diren produktuok Arabako Lurralde Historikoan dauden instalazio, ekipo edo aparatuetan erabiltzen dituztenean.

Berotegi-efektuko gas fluordunen xedea autokontsumoa denean, Zergaren ordainarazpena Arabako Foru Aldundiari egokituko zaio autokontsumo hori Arabako Lurralde Historikoan egiten denean.

Aurreko paragrafoan aurreikusten ez diren gainerako kasuetan, ordainarazpenaz Arabako Foru Aldundia arduratuko da zergadunak zerga egitatean egiten dueneko establezimendua Arabako Lurralde Historikoan dagoenean.

5. artikulua. Kontzeptuak eta definizioak

1. "Azken kontsumitzailea": berotegi-efektuko gas fluordunak produktuetan txertatzeko edo azkenean instalazio, ekipo edo gailuetan erabiltzeko egotzitako Zergarekin eskuratzen dituen pertsona edo erakundea; halaber, azken kontsumitzaile izango da berotegi-efektuko gas fluordunak ekipo edo tresnen fabrikazioan nahiz bere bezeroen ekipo edo tresnen karga, birkarga, konponketa edo mantentze-lanean erabiltzeko eskuratu dituen pertsona edo erakundea, baldin eta salgai hoztuen garraiorako 3 kg baino gutxiagoko fluordun gas karga daukaten hozkailu ekipoen maneiatazilearen edo ibilgailuetan instalatutako pertsonen erosotasun termikokorako hozgarri fluordunak erabiltzen dituzten hozte-sistemen maneiatazilearen ziurtagiria soilik badauka, fluordun gasen eta horietan oinarrituriko ekipoen merkaturatzea eta manipulazioa eta horiek erabiltzen dituzten profesionalen akreditazioa arautzen dituen ekainaren 16ko 795/2010 Errege Dekretuaren I. Eranskinean ezarrita dagoenaren arabera.

Ondorio horietarako, "ibilgailuak" dira pertsonak edo salgaiak garraiatzeko edozein bitarteko, bazter utzita trenbideak, itsasontzi eta aireontziak eta barnean direla nekazaritza edo industria erabilerako makina mugigarriak.

2. "Ekipo edo tresna berriak": lehen aldiz erabiltzen diren edo abian jartzen diren ekipoak, tresnak eta instalazioak dira.

3. "Atmosfera berotzeko potentziala": berotegi-efektuko gas fluordun batek karbono dioxidoaren potentzialarekin alderatuta duen berokuntza klimatikorako potentziala da, 100 urte inguruko epea hartuta kontuan. Gas horiek 11. artikuluko paragrafoko 1. zenbakian adierazten den atmosfera berotzeko potentziala dute.

4. "Prestakin batek atmosfera berotzeko duen potentziala": 11. artikuluko 1. zenbakian aipatzen den substantzia bakoitzaren pisuaren arabera zatikien batura atmosfera berotzeko duten potentzialarekin eta ehuneko +/- 1eko pisu-tolerantziarekin biderkatzetik eratorritako batez besteko haztatua da.

5. "Prestakina": bi substantziaren edo gehiagoren arteko nahasketa, horietako bat gutxienez berotegi-efektuko gas fluorduna denean, prestakin horrek atmosfera berotzeko duen potentziala 150 baino txikiagoa denean salbu.

6. "Birziklatzea": berotegi-efektuko gas fluordunen gaineko zerga aplikatzeko den lurraldean garbiketarako oinarrizko prozedura bidez egiten den tratamendua.

7. "Birsorkuntza": berotegi-efektuko gas fluordunen gaineko zerga aplikatzen den lurraldean prozedura edo tratamendu kimikoen bitartez egiten den berreskuratzeko tratamendua eta hobekuntza; betiere, gas fluordunaren ezaugarri teknikoek buruzko arauaren arabera mailak ezartzeko helburuarekin.

8. Foru Arau honetan agertzen diren kontzeptuei eta terminoei dagokienez, eta bertan hala definitzen den kasuetan salbu, berotegi-efektuko gas fluordunei dagokienez Europar Batasuneko eta Estatuko araudian xedatzen dena bete beharko da.

9. "Zerga aplikatzeko Lurraldea": Espainiako lurraldea.

6. artikulua. Zerga egitatea

Honako hauek daude Zergapean:

a) Europar Batasunean ekoitzi, inportatu edo erosi ondoren lehenengoz saldu edo entregatzen diren berotegi-efektuko gas fluordunak. Era berean, lehen salmentaren edo entregaren parekoa izango da enpresaburuek berotegi-efektuko gas fluordunak berriz saltzea, horiek eskuratzean 7. artikuluko 1. zenbakiko a) hizkian araututako salbuespena aplikatu zaienean.

b) Berotegi-efektuko gas fluordunen autokontsumoa. Autokontsumotzat hartuko da aurreko hizkian aipatzen diren enpresaburuek, Europar Batasuneko erosleek, inportatzaileek edo ekoi-zleek berotegi-efektuko gas fluordunak erabiltzea edo kontsumitzea.

2. Berotegi-efektuko gas fluordunak saltzearen edo entregatzearen zerga ez da ordaindu beharrik izango, baldin eta Europar Batasuneko ekoi-zleak, inportatzaileak edo erosleak zerga aplikatzen den lurralde esparrutik kanpo bidali behar baditu.

Era beran, ez dute zerga hori ordaindu beharrik izango atmosfera berotzeko 150 edo gutxiagoko potentziala duten berotegi-efektuko gas fluordunen salmenta edo entregek eta autokontsumoak.

3. Aurkakoa frogatu ezean, berotegi-efektuko gas fluordunak zergarekin lotutako salmenta edo entregaren xede izan direla ulertuko da, zergadunek produktu fabrikatuen, inportatuen edo erosien norakoa justifikatzen ez dutenean.

7. artikulua. Salbuespenak

1. Erregelamenduaren arabera ezartzen diren baldintzetan salbuetsita egongo dira honako hauek:

a) Berotegi-efektuko gas fluordunak zerga aplikatzen den lurralde esparruan birsaldu behar dituzten enpresaburuei lehen aldiz saltzea edo entregatzea.

Salbuespen hori aplikatzeko orduan, ez da joko enpresaburuek berotegi-efektuko gas fluordunak horien birsalmentara xedatzen dituztela, horiek produktuak, ekipoak edo tresnak fabrikatzeko, kargatzeko, birkargatzeko, konpontzeko edo mantentzeko erabiltzen direnean; betiere, d) hizkian ezarritakoari kalterik egin gabe.

b) Enpresaburuei berotegi-efektuko gas fluordunak lehen aldiz saltzea edo entregatzea –produktu, ekipo edo aparatuetako edukiak barne–, horiek zerga aplikatzen den lurralde esparrutik kanpo bidaltzen edo erabiltzen direnean.

Salbuespen eskubidea aplikatzeko baldintzak erregelamendu bidez ezarriko dira, horiek zerga aplikatzen den lurralde esparrutik kanpo bidaltzen edo erabiltzen direnean.

c) Berotegi-efektuko gas fluordunak lehen aldiz saltzea edo entregatzea gas horien konposizioa guztiz aldatzeko eraldaketa kimikoko prozesuetan lehengai gisa erabiltzen dituzten enpresaburuei.

d) Berotegi-efektuko gas fluordunak enpresaburuei lehen aldiz saltzea edo entregatzea, horiek lehen aldiz ekipo edo aparatu berrietan txertatzen direnean.

e) Enpresaburuei berotegi-efektuko gas fluordunak lehen aldiz saltzea edo entregatzea, gas horiek inhalaziorako aerosol dosifikatzaile gisa aurkezten diren sendagaiak fabrikatzeko erabiltzen direnean.

f) Ekipo edo aparatu berrietatik lortutako berotegi-efektuko gas fluordunak lehen aldiz saltzea edo entregatzea.

g) Inhalaziorako aerosol dosifikatzaile gisa aurkezten diren sendagaietatik lortutako edo inportatutako berotegi-efektuko gas fluordunak lehen aldiz saltzea edo entregatzea.

2. Erregelamendu bidez zehazten diren baldintzei jarraiki, enpresaburuei edo profesionaleri egindako lehen salmentak edo entregak ehuneko 90eko salbuespena izango du, atmosfera berotzeko 3.500 edo gutxiagoko potentziala duten berotegi-efektuko gas fluordunak suteak itzaltzeko sistema finkoetara bideratzen direnean, edo suteak itzaltzeko sistema finkoetatik inportatzen edo eskuratzen direnean.

3. Artikulu honetako 1 eta 2. zenbakietan xedatutakoari kalterik egin gabe, horrela eskuratutako berotegi-efektuko gas fluordunak salbuespen eskubidea eragiten duten beste erabilera batzuetara bideratzen badira, lehen salmenta edo entrega gas horiek zerga aplikatzekoa den lurralde esparruan kontsumitzen diren edo erabilera horietarako erabiltzen diren momentuan bertan egin dela ulertuko da.

8. artikulua. Sortzapena

1. Zergaren xede diren produktuak erosleen edo, hala badagokio, autokontsumoaren eskura jartzen diren momentuan sortuko da zerga.

2. 6. artikuluko 3. zenbakian aurreikusitako kasuetan, produktua fabrikatzean, inportatzean edo erostean sortuko da zerga, irregularitasuna egin den data frogatu daitekeen kasuetan salbu, horrelakoetan hura izango baita zerga sortzen den momentua.

3. 7. artikuluko 3. zenbakian aurreikusitako egoeretan, lehen salmenta edo entrega egiten denean sortuko da zerga.

9. artikulua. Zergadunak

1. Zerga ordaindu beharko dute berotegi-efektuko gas fluordunen erkidegoko fabrikatzaileek, inportatzaileek edo eskuratzaileek; baita horiek saldu edo entregatzen, edo zergari loturik dauden autokontsumorako jarduerak gauzatzen dituzten enpresaburu birsaltzaileek ere.

2. 7. artikuluko 3. zenbakian aurreikusitako egoeretan, zergaduntzat joko dira berotegi-efektuko gas fluordunak zerga aplikatzen den lurralde esparruko salbuespen eskubidea aplikatzen ez zaien beste erabilera batzuetara bideratzen dituzten enpresaburuak.

10. artikulua. Zerga oinarria

Zergaren xede diren produktuen pisuaren arabera izango da zerga oinarria; pisu hori kilogramotan adieraziko da.

11. artikulua. Zerga tasa

1. 1. tarifa:

Atmosfera berotzeko potentzialaren arabera izango da zerga.

Zerga-tasa kalkulatzeko, 0,020 koefizientea aplikatuko zaio gas fluordun bakoitzak atmosfera berotzeko duen potentzialari; dena den, gehienez ere 100 euro ordainduko dira kilogramo bakoitzeko, honako epigrafe hauei jarraiki:

EPIGRAFEA	BEROTEGI-EFEKTUKO GAS FLUORDUNA	ATMOSFERA BEROTZEKO POTENZIALA	MOTA/EURO/KG
1.1	Sufre hexafluoruroa	22.200	100
1.2	HFC – 23.	12.000	100
1.3	HFC – 32.	550	11
1.4	HFC – 41.	97	—
1.5	HFC – 43-10mee.	1.500	30

EPIGRAFEA	BEROTEGI-EFEKTUKO GAS FLUORDUNA	ATMOSFERA BEROTZEKO POTENTZIALA	MOTA/EURO/KG
1.6	HFC – 125.	3.400	68
1.7	HFC – 134.	1.100	22
1.8	HFC – 134a.	1.300	26
1.9	HFC – 152a.	120	—
1.10	HFC – 143.	330	6,6
1.11	HFC –143a.	4.300	86
1.12	HFC – 227ea.	3.500	70
1.13	HFC – 236cb.	1.300	26
1.14	HFC – 236ea.	1.200	24
1.15	HFC – 236fa.	9.400	100
1.16	HFC – 245ca.	640	12,8
1.17	HFC – 245fa.	950	19
1.18	HFC – 365mfc	890	17,8
1.19	Perfluorometanoa	5.700	100
1.20	Perfluoroetanoa	11.900	100
1.21	Perfluoropropanoa	8.600	100
1.22	Perfluorobutanoa	8.600	100
1.23	Perfluoropentanoa	8.900	100
1.24	Perfluorohexanoa	9.000	100
1.25	Perfluorociclobutanoa	10.000	100

2. 2. tarifa:

2.1 epigrafea. Prestakinak: zerga-tasa kalkulatzeko, 0,020 koefizientea aplikatuko zaio prestakinetik eratorritako atmosfera berotzeko potentzialari, betiere 5. artikuluko 2. zenbakian xedatutakoa kontutan hartuta eta kilogramo bakoitzeko gehienez ere 100 euro ordainduko direla.

3. 3. tarifa:

3.1 epigrafea. 1. tarifako gas birsortuak eta birziklatuak: zerga tasa kalkulatzeko, 0,85 koefizientea aplikatuko zaio 1. tarifiari zehaztutako tasari.

3.2 epigrafea. 2. tarifako prestakin birsortuak eta birziklatuak: zerga tasa kalkulatzeko, 0,85 koefizientea aplikatuko zaio 2. tarifiari zehaztutako tasari.

12. artikulua. Kuota osoa

Zerga oinarriari karga tasa aplikatzearen emaitza izango da kuota osoa.

13. artikulua. Zerga jasanaraztea

1. Zergadunek sortutako kuoten zenbatekoa jasanarazi beharko diete zergaren xede diren produktuen erosleei. Erosleak kuotak jasatera behartuta egongo dira.

2. Jasanarazitako kuotak fakturan jasanaraziko dira, bertan jasotzen diren gainerako kontzeptuetatik bereizita. Zerga ordaindu behar ez duten edo salbuetsita dauden eragiketen kasuan, egoera hori berariaz adieraziko da aipatutako agirian, betiere hobari horren aplikazioa jasotzen duen Foru Arau honetako manua argi eta garbi adieraziz.

3. Eragindako kuotak ez dira jasanaraziko ikuskapen akten ondorio diren likidazio kasuetan eta oinarrien zeharkako balioespeneko kasuetan.

14. artikulua. Kenkariak eta itzulketak

1. Likidazioaldi bakoitzari dagozkion autolikidazioetan, eta erregelamendu bidez zehaztutako baldintzetan, zergadunek herri administrazio eskudunak aitortutako hondakin-kudeatzaileei eman dizkieten berotegi-efektuko gas fluordunei dagozkien zerga ordainduaren kuotak kendu ahal izango dituzte, horiek hondakinen sektoreko legedian jasotako dokumentazioari eta kontrolari jarraiki suntsiarazteko, birziklatzeko edo birsortzeko helburuarekin.

Kenkari hori aplikatzeko, suntsipena gertatu den likidazio aldiari dagokion kuota murriztuko da. Bidezko diren kenkarien zenbatekoa likidazio aldiaren sortutako kuoten zenbatekoa baino gehiago denean, gaindikin hori hurrengo likidazio aitortutako konpentsatu ahal izango da, baldin eta gaindikin hori sortu zen aldiari dagokion likidazio aitortutako aurkeztu zenetik kontatzen hasita lau urte igaro ez badira.

2. Berotegi-efektuko gas fluordunen azken kontsumitzaileek, zerga ordaindu dutenean, eta 7. artikuluan aurreikusitako salbuespenak aplikatzeko eskubidea dutenean edo herri-administrazio eskudunak aitortutako hondakin-kudeatzaileei berotegi-efektuko gas fluordunak eman izana egiaztatzen dutenean –horiek hondakinen sektoreko legedian jasotako dokumentazioaren eta kontrolen arabera suntsitu, birziklatu edo birsortzeko helburuarekin, eta aurretiaz kenkaririk aplikatu ez bazaie–, hura itzultzeko eskatu ahal izango diote Tributu Administrazioari, erregelamendu bidez zehaztutako baldintzetan.

15. artikulua. Kudeaketako arau orokorrak

1. Sortutako kuotak adieraziko dituen autolikidazio bat aurkeztu beharko dute lau hilean behin zergadunek; era berean, zerga zorra ordaindu beharko dute harekin batera.

2. Arabako Foru Aldundiko Ogasun, Finantza eta Aurrekontu Saileko foru diputatuak ezarriko ditu aurreko zenbakian aipatzen diren autolikidazioak aurkezteko ereduak, epeak, betebeharrak eta baldintzak, bai eta, hala badagokio, aurretiaz produkturen prezioan jasan duen baina kenkaririk izan ez duen zergaren itzulketa eskatzekoak ere.

3. Foru Arau honen 6. artikuluan adierazitako jarduerak gauzatu dituzten zergadunek nahitaez inskribatu beharko dituzte beren instalazioak berotegi-efektuko gas fluordunen gaineko zergaren lurralde erregistroan.

4. Merkataritzako xedapenek eta zerga nahiz sektore izaerako beste arau batzuek zehaztutako kontabilitate baldintzak edozein direla ere, berotegi-efektuko gas fluordunen izakinen kontabilitatea erregelamendu bidez xedatutako moduan eramatea zehaztu ahal izango da.

5. 11. artikuluko 3. zenbakian aurreikusitako zerga tasak aplikatzeko, erregelamendu bidez zehaztutako baldintzak bete beharko dira.

16. artikulua. Arau hausteak eta zehapenak

Zerga honekin lotutako arau hausteak otsailaren 28ko 6/2005 Foru Arau Orokorrak, Arabako zergenak, eta Diputatuen Kontseiluaren azaroaren 18ko 97/2008 Foru Dekretuak, zerga arau hauste eta zehapenen arautegia onartzen duenak, aurreikusitakoarekin bat etorritik sailkatu eta zehatuko dira.

17. artikulua. Araubide iragankorra

2014ko eta 2015eko ekitaldietarako, berotegi-efektuko gas fluordunen gaineko zergan aplikatutako diren zerga tasak kalkulatzeko, Foru Arau honetako 11. artikuluan araututako tasak 0,33 eta 0,66 koefizienteekin biderkatuko dira, hurrenez hurren.

Nolanahi ere, 2014ko, 2015eko eta 2016ko ekitaldietarako, poliuretanoa ekoiztera bideratutako edo dagoeneko fabrikatuta dagoen poliuretano bidez inportatutako edo bereganatutako gas fluordunei aplikatu beharreko zerga tasa kalkulatzeko, atmosfera berotzeko duen potentzialaren arabera dagokion zerga tasa –Foru Arau honetako 11. artikuluan jasotzen da– 0,05, 0,10 eta 0,20 koefizientearekin biderkatuko da, hurrenez hurren.

AZKEN XEDAPENAK

Lehenengoa. Indarrean jartzea.

Xedapen orokor hau ALHAOn argitaratu eta hurrengo egunean jarriko da indarrean eta 2014ko urtarrilaren 1etik aurrera izango ditu ondorioak.

Bigarrena. Gaitzea.

Arabako Foru Aldundia gaitu egiten da xedapen orokor hau garatzeko eta aplikatzeko beharrezkoak diren xedapen guztiak eman ditzan.

Vitoria-Gasteiz, 2014ko uztailaren 9a

Lehendakaria

JUAN ANTONIO ZÁRATE PÉREZ DE ARRILUCEA